

Na osnovu člana 4. Odluke o načinu raspoređivanja finansijskih sredstava iz Budžeta Grada Tuzla neprofitnim organizacijama po LOD metodologiji („Službeni glasnik Grada Tuzla“, broj 1/19, 7/20, 5/21, 4/22, 2/24 i 3/25), u skladu s tačkom 12. Smjernica o minimalnim standardima dodjele budžetskih sredstava putem transfera i subvencija u Federaciji Bosne i Hercegovine („Službene novine Federacije BiH“, broj 15/18) i Budžetom Grada Tuzle za 2025. godinu („Službeni glasnik Grada Tuzla“, broj 3/25 i 4/25), Služba za ekonomski razvoj, poduzetništvo i poljoprivredu Grada Tuzle, donosi

PROGRAM

utroška sredstava iz Budžeta Grada Tuzle za 2025. godinu sa pozicije –Tekući grant za finansiranje projekata iz oblasti poduzetništva

Član 1.

Programom utroška sredstava iz Budžeta Grada Tuzle za 2025. godinu sa pozicije-Tekući grant za finansiranje projekata iz oblasti poduzetništva (u daljem tekstu: Program), određuju se prioritetni pravci i oblici podrške, korisnici sredstava, prihvatljive aktivnosti u projektima koje će aplicirati potencijalni učesnici u javnom pozivu, te minimalan i maksimalan iznos podrške po projektu, kao i druga pitanja u vezi sa načinom utroška navedenih namjenskih sredstava, koja se mogu dodijeliti neprofitnim organizacijama, fondacijama i privrednim komorama, a dodjeljuju se na projektnoj osnovi kandidovanjem projekata putem javnog poziva.

Član 2.

Opći cilj ovog Programa je jačati partnerstvo, održivi dijalog između neprofitnih organizacija i Grada Tuzle i sinergijski djelovati na razvoj poduzetništva kao bitne komponente ukupnog lokalnog ekonomskog razvoja grada Tuzle.

Projekti koji se mogu prijaviti za učešće u raspodjeli sredstava iz člana 1. ovog Programa treba da su usmjereni na oblast poduzetništva, jednu od prioritetnih oblasti obuhvaćenih Odlukom o načinu raspoređivanja finansijskih sredstava iz Budžeta Grada Tuzla neprofitnim organizacijama po LOD metodologiji („Službeni glasnik Grada Tuzla“, broj 1/19, 7/20, 5/21, 4/22, 2/24 i 3/25), (u daljem tekstu: Odluka).

Član 3.

U Budžetu Grada Tuzle za 2025. godinu, u dijelu Službe za ekonomski razvoj, poduzetništvo i poljoprivredu, na poziciji-Tekući grant za finansiranje projekata iz oblasti poduzetništva (ekonomski kod 614311/49), planirana su sredstva u iznosu od 30.000,00 KM i bit će raspoređena za podršku projekata koje će aplicirati neprofitne organizacije čiji su ciljevi i programske aktivnosti pretežno usmjerene na oblast poduzetništva.

Prema DOB-u Grada Tuzle za period 2025-2027. godina planirana sredstva na ovoj poziciji iznose godišnje po 30.000,00 KM.

Planiranje budžetskih sredstava na predmetnoj poziciji povezano je sa Strategijom razvoja grada Tuzla do 2026. godine, u okviru 1. strateškog cilja - Povećati konkurentnost privrede. (sektorski cilj: Ubrzanje ekonomskog razvoja i unapređenje konkurentnosti privrede).

Član 4.

Fokus projekata koji se mogu podržati sredstvima iz ovog Programa treba da bude na sljedećim prioritetnim područjima odnosno podoblastima u okviru prioritetne oblasti-poduzetništvo, definisane Odlukom iz člana 2. ovog Programa, s krajnjim ciljem:

- na ekonomskom osnaživanju povećanjem zapošljivosti specifičnih ciljnih grupa u segmentu socijalnog poduzetništva (osobe s invaliditetom, nezaposlene žene, nezaposlene mlade osobe do 35 godina i sl.),
- razvoju poduzetništva, malih i srednjih preduzeća i obrta kao i promociji razvojnih potencijala grada Tuzle (manifestacije, sajmovi, izložbe i drugi prigodni oblici), kao dio sveobuhvatnijeg projekta,
- unapređenju ambijenta za razvoj turizma i promociju turističkih potencijala, kreativne industrije i slično,
- podršci inovativnosti i podizanju nivoa svijesti o potrebi razvoja tehnologije u proizvodnji i poslovnom procesu (edukacija, razvoj ljudskih resursa i slično),
- podršci razvoju tradicionalnih i tipičnih proizvoda i ruralnog poduzetništva.

Projekti koje će zainteresirane neprofitne organizacije u oblasti poduzetništva kandidovati putem javnog poziva za raspodjelu sredstava za prioritetnu oblast-poduzetništvo treba da doprinesu rješavanju jednog ili više prioriteta u navedenim prioritetnim područjima odnosno podoblastima. Putem javnog poziva za raspodjelu sredstava iz ovog Programa projekte mogu prijaviti organizacije koje da aktivno rade na pružanju podrške poduzetnicima i obrtnicima na području grada Tuzle, koje aktivno djeluju na stvaranju uslova za razvoj i unapređenje sektora poduzetništva i razvijanje svijesti o poduzetništvu prema ciljnim grupama, mladih, nezaposlenih žena, osoba sa invaliditetom i drugih kategorija krajnjih korisnika u segmentu socijalnog poduzetništva, koje raspolažu odgovarajućim stručnim kadrom, tehničkim pretpostavkama i prethodnim iskustvom za kvalitetnu realizaciju projekata u navedenim prioritetnim područjima, te koje ispunjavaju i ostale uslove utvrđene Odlukom iz člana 2. ovog Programa.

Član 5.

Pojedinačna podrška projekata iz sredstava ovog Programa može iznositi od 2.000,00 do 5.000,00 KM.

Projekti se mogu sufinansirati vlastitim sredstvima organizacija-potencijalnih učesnika u javnom pozivu i/ili sredstvima osiguranim od drugih donatora.

Sredstvima koja će se dodijeliti u okviru javnog poziva za raspodjelu sredstava iz ovog Programa mogu se finansirati administrativni troškovi korisnika dodijeljenih sredstava, pod kojim se podrazumijevaju: troškovi osoblja, uredski troškovi i troškovi putovanja i prevoza u maksimalnom ukupnom iznosu do 20% odobrenih sredstava.

Sredstva ovog Programa neće se rasporediti u cijelosti ukoliko po javnom pozivu ne bude zaprimljen dovoljan broj kvalitetnih projekata odnosno projekata koji zadovoljavaju kriterije utvrđene Odlukom iz člana 2. ovog Programa.

Projekti aplikacija treba da se sastoje od nezavisnih operativnih aktivnosti (različitih oblika podrške), sa jasno formulisanim operativnim ciljevima, ciljnim grupama i planiranim ishodima, te da odgovore na specifične potrebe lokalne zajednice i da doprinesu ostvarivanju ciljeva iz ovog Programa.

Aktivnosti projekata koje će prijaviti neprofitne organizacije putem javnog poziva za raspodjelu sredstava ovog Programa, moraju se realizovati na području grada Tuzle.

Član 6.

Projekte koji će biti kandidovani putem javnog poziva za raspodjelu sredstava iz ovog Programa mogu prijaviti neprofitne organizacije (udruženja, fondacije i privredne komore) koje aktivno djeluju na podršci i predstavljanju poduzetnika i obrtnika s području grada Tuzle, zatim koje aktivno djeluju na stvaranju uslova za razvoj i unapređenje sektora poduzetništva, na razvijanju svijesti o poduzetništvu kod pripadnika ciljnih grupa mladih, nezaposlenih žena, osoba sa invaliditetom i drugih kategorija krajnjih korisnika u segmentu socijalnog poduzetništva, te koji posjeduju odgovarajući stručni kadar i materijalno tehničke pretpostavke za implementaciju kandidovanog projekta, s ciljem direktne i indirektna podrške krajnjih korisnika iz navedenih ciljnih grupa. Projekti će se kandidovati putem javnog poziva koji će objaviti nadležna Služba u okviru koje su pozicionirana sredstva iz ovog Programa.

Član 7.

Odredbe ovog Programa primjenjuju se na postupak raspodjele sredstava predviđenih u Budžetu Grada Tuzle za 2025. godinu, na poziciji-Tekući grant za finansiranje projekata iz oblasti poduzetništva (ekonomski kod 614311/49), namijenjenih za dodjelu neprofitnim organizacijama iz oblasti poduzetništva na ime podrške projekata kandidovanih putem javnog poziva.

Član 8.

Ovaj Program stupa na snagu danom donošenja i ne objavljuje se u „Službenom glasniku Grada Tuzla“, a objavit će se na službenoj internet stranici Grada Tuzle.

Dokument priprmila: Dijana Dizdarević.

04/11-10951-2025
Broj: 2025 DD
Tuzla, 10.7. 2025. godine

**Pomoćnik gradonačelnika
za Službu za ekonomski razvoj, poduzetništvo i poljoprivredu**

Alma Halilović, dipl.ecc.